

程

七十二峰足徵集卷十七

武峰吳定璋友篁菟錄

東山張鉞立亭編訂

徐 隱

隱字庭蘭號南坡老人與弟庭相攻詩文有聲譽
為西洞庭望族

溪山小隱

廿年林下著荷衣一片閒心與世違
鏡裡星霜華髮短日邊冠蓋故人稀
白雲滿地春陰合碧玉千

竿晴翠飛獨掩衡門醉高卧東風吹老北山薇
送吳行人惠出使占城

皇華使客舊仙郎覽德爭看下鳳凰
萬里風雲馳遠道九天雨露被遐方
銀河秋動靈槎影碧漢宵騰寶劍光
深喜觀風歸有頌玉階敷對接鵷行

徐 案

案字庭栢號木石居士

寄許瀾伯

通波亭下隱君家春水流香帶落花
高卧讀書樓

上月硯池清興墨翻鴉

畫梅

綠毛小鳳怯春寒啼繞花枝夜未殘
幾度暗香來紙上夢回明月上闌干

徐 輝

輝字宗耀號介菴

贈隱者

石林茅屋鎖雲深路隔紅塵不可尋
芸葉雲香朝點易梅花月白夜鳴琴
休糧自有山中石長物原

無索裡金午夜夢回瞻緯象少微星燭太湖陰

徐鑑

鑑字德輝

思歸

杜若香生燕子泥辛夷花發柳棉飛鄉心一片渾
無賴客路三千正憶歸足跡敢追司馬轍爛斑空
想老萊衣蘭舟蕩漾春江上愁對東風詠式微

無題

綵雲一朵隔蓬山玉珮珊珊不可攀天上只今無

錦字却教青鳥使空還

徐章

章字德彰與其弟震力學能文克亢其宗王守溪
撰徐震墓志極稱之

題普春上人所藏謝孔昭畫

蔡邱先生才絕奇詩情畫筆追王維家君曾延主
西席講罷我輩從遊嬉呼童時輩錦囊出寶馬金
鞍過南陌春色不知何處來柳花亂卷東風白普
春上人尤知心相逢留坐長松陰閑將瑤琴撫一

曲散作青天鸞鳳吟是時先生縱吟目對景寫成
圖一副興闌人散夕陽西長笑一聲山水綠先生
仙遊已十秋至今惟有斯圖留持來索我賦長句
等閒成作古今愁

題隱雲堂卷

具區有名山橫絕波濤間上人此學道身與雲俱
閑白雲英英山轟轟半倚青天半林木有時散盡
露四維天光倒浸波光綠草堂結構山之陽雲來
飛遶何悠揚皎若梨花幾千朵碧陰滿地春茫茫

我曾昔日尋幽去雲亦多情為留住今來重覓舊
遊踪回首蒼茫不知處上人攜我登臺基持圖索
賦隱雲詩吟成一笑出門去何日更與雲為期

春日與周宗學賞花

輝輝林間日采采枝頭花相逢社中友睹此新物
華贈我以佳章飲我以流霞願言終此歡轉眼成
泥沙

旅次黃州江口

渺渺天連水西風雁度遲清秋將盡日遊子未歸

時落日孤舟夢閒雲遠道思殘楓與衰柳相對益
淒其

與陳未菴施克卿秋夜話舊

空江煙雨送秋歸黃葉蕭蕭獨雁飛新接笑談三
宿共舊遊心事十年違燈因坐久花頻落酒為寒
多力漸微明發不堪回首望別情吟思共依依

華山寺

煙霞深鎖梵王宮石壁蒼苔路幾重山入半空風
作雨水流深澗玉為龍亂搖雲影干竿竹怒吼濤

聲萬樹松正欲登臨遍吟覽夕陽敲斷講時鐘

題梅送友

萬樹籠香障白雲孤山深處隔塵氛玉顏為惜君
歸去却向東風瘦幾分

入城訪德昭

家住湖山小洞天數村雞犬自風煙因過城市逢
君話流水桃花又隔年

觀况蘇州草書

香凝燕寢晝遲遲揮翰曾勞近墨池滿紙雲煙飛

不去風流猶自憶當時

徐震

震字德重少從陳嗣初學詩有懷古諸作傳播人口與西蜀晏鐸海昌蘇平倡和景泰間與十才子之列以孫縉官吏部侍郎贈如其官

長相思

碧紗風度燈花墜暗數殘更不成寐百結愁腸宛轉回羅衫濕盡相思淚胡天八月寒飛霜邊城茫茫邊草黃青天夜夜同明月照入孤幃幽思長去

年縫衣寄征客今年秋盡無消息妾心不作連理枝見君願學雙飛翼

輕薄篇

長安城中美少年雕鞍白馬珊瑚鞭揚眉吐氣動光彩浮華贏得兒童憐龍腦香凝綺羅服鬪雞走狗爭馳逐只將富貴等樗蒲那有閒情把書讀長安甲第連狹斜九秋明月三春花美人當筵勸春酒醉宿青樓即是家黃金買笑朝還夕黃金散盡無顏色祇恐逢人問往年蓆門掩雨秋蕭瑟回頭

却羨田舍郎讀書一旦登巖廊

秋夜與施愛雲話舊

寂寥江館掩秋陰兩鬢重逢雪滿簪
百里佳期今夕酒一燈清話故人心
西風斷雁經寒早落葉空山積雨深
千載陳雷高誼在交游誰復重黃金

咸陽懷古

阿房宮闕對南山閣道縈迴霄漢間
霸業終隨烽火盡遊魂俄載屬車還
三千童女空浮海十萬貔貅已入關
留得當年遺恨在長安血淚土猶斑

錢塘懷古

黃沙漠漠起邊烽萬里山河落照中
奸佞遽成南渡計英雄空誓北征功
冬青樹老無遺塚瑞石山荒有廢宮
此日經行弔陳迹野花和露泣殘紅

包山寺

屋下清泉屋上山薜蘿深處扣禪關
尋僧欲問三生話策杖來偷半日閒
雁沒浦雲秋色外鶴歸庭樹夕陽間
人生為惜歡遊少石壁題詩紀往還

徐鐘

七十二峰

西山

卷十七

鐘字德和號節菴

羅浮春咏

羅浮仙子下蓬瀛
漏洩天心物外晴
掩映梨雲香一片
徘徊璧月夜三更
不妨春色尋常瘦
自有鉛華別樣清
寄語小鬟休弄笛
東風零落滿江城

徐琦

琦字德用

客中有懷東周吳菴陳未菴

漢陽城北水東流
楓葉蘆花萬里秋
白雁未傳卿

國信碧雲空結海天愁
吳中文翰推洪道江右詩
名數太邱幾度蓬窗望
奎壁光華還自燭南州

徐璉

璉字德熙號寅軒

秋日江館寫懷

水國天寒樹影稀
西風何處雁南飛
郢中白雪無人
和湖上青山有夢歸
獨對浮雲傷往事
驚看秋草又斜暉
十年浪迹煙波外
滿眼塵氛未拂衣

登金山寺

一峰玉立大江中絕頂登臨四望通淮甸有山皆
向北南徐無水不流東樓臺影落波心月鐘鼓聲
傳渡口風明日仙凡便相隔海天千里放歸篷

徐珍

珍字德孺號魯軒

送劉公子還遼陽

麒麟公子偉衣冠擒虜能令海宇安手挽彤弓孤
月滿腰懸寶劍七星寒巫閭山曉聽雞度渤海潮
生駐馬看想到遼陽春漸老落花香裡卸金鞍

徐璿

璿字仲瑛號友竹

南河雨中有懷花臺諸友

滿天風雨楚江干夜聽波聲夢不安旅館有愁燒
燭短鄉書無雁到家難梅腮韞玉寒猶在柳眼回
青濕未乾却憶花臺文社友一樽何日罄交懽

徐瓊

瓊字仲玉號素軒

贈南溪隱居

七十二峰

西山

卷十七

數椽茅屋遂安居幾畝田園樂有餘風送落花常
入座雨添新漲暗通渠囊中自著高人傳門外時
過長者車祇恐天書來日下未容終老伴樵漁

徐縉

縉字子容號崦西德重之孫弘治戊午舉人乙丑
進士由翰林歷官吏部左侍郎嘉靖中經筵侍講
每郊祀重典數被簡命後觸忤張孚敬遭誣奪職
尋復官致仕歸卒年六十有七贈禮部尚書謚文
敏諭祭葬所著有經筵講義六卷詩文五卷

東湖詩

桂林鬱靈奧山海互環旋火雲羅碧嶂冰井瀉寒
泉既產名世士亦棲淵尚賢惟公抱經綸卜築依
自然引水滙方池池廣不復穿蒲荷翠堪把水竹
清可憐作室倚北阜啓扉面南川適性非外慕因
事罕求全祇開蔣生徑兼收鄴侯編襟懷獲昭曠
而不嬰垢喧因名小東湖聊以任所便

送徐昌穀使湖南

清晨送良友把袂岐路傍徬徨各仰視春鳥雙飛

翔眷言乘桂棹三月返故鄉升堂拜家慶自越浮
三湘先弔汨羅陰繼上衡山陽衡山七十二一一
相低昂攀蘿凌絕頂慨然覽四方附書與歸雁慰
我長相望

三月十日送沈太史
至深溝歸歷大通河
景物可愛作詩紀之

曉起送行客出郊十餘里去騎逐紅塵歸來歷河
浹桃花隔岸開翠柳垂幽汜飄風自東來好鳥鳴
不止河水碧湛湛下見魴與鯉日光射晴波競躍

浮萍裡況有羣浴鳥泛泛良可喜每懷江南春頓
覺還眼底恍惚復躊躇歸心浩然起

三月過仲默宅夜話

九十春將盡江湖我欲行頻年遊子意此夕故人
情惜別金尊滿憂時白髮生岳陽風景地覓爾舊
題名

湛子至自安南時予將有湖南之行

萬里交南使三年冀壯思如何君到日又是我歸
時歲月憐駒隙風煙感路歧殷勤將母意惟有故

人知

送劉德徵之夔府

十月下夔州瞿塘水勢收雲高巫峽起煙冥石堂
幽客夢驚猿獮仙槎拂斗牛褰帷問殊俗誰不羨
風流

水西為唐隱君賦

鶴髮仙翁何處棲潤州城畔水之西橋臨丁卯雲
沙淨山對金焦紫翠迷五柳晝眠陶令宅百花春
入杜陵溪不辭煙雨常垂釣已有袞章出紫泥

過王子經林西別墅

洞庭東畔竹林西小院風流靜可栖天際好山青
未了雨餘芳樹綠初齊亭開碧沼塵埃絕樓俯澄
湖日月低鄭谷朝川何異此玉缸春酒尚能攜

送沈宜學孝廉分教泰和兼柬空同子

十年不見沈休文此日長安又惜分可但才華承
爾祖更知師表出人羣清歌夜對澄江月謾興晴
瞻快閣雲南過匡廬逢李白道余相憶致殷勤

石公山

雲障天門次第開千年埋沒半蒼苔一從太傅題
名後贏得遊人日日來

徐 鱗

鱗字紹卿德輝之孫初名陵慕李陵之為人跌宕
自喜時從少年為狎遊揮金如土挾筴游建業徧
覽形勝名秦淮歌姬命酒劇飲酒酣以往援筆賦
詩感歎六代興亡高歌長嘯引聲出蕭瑟間視舉
世如無也數射策不中遂弃去晚年食貧喪子寄
居浮屠舍蕭然如旅人皇甫子循及張 牧劉鳳掃

室布席爭延致之年踰八旬神明不衰議論古今
才辯盡滿意氣勃發堅悍少年弗如也其詩貴華
彩尚標致經營用思愈老愈深皇甫子循為醵金
刻其集

消夏灣

五湖饒靈境澄灣自天開屏間玉鏡湛波上雲峰
迴春林窮虧蔽秋渚盡沿洄南山信蜿蜒壯阜亦
崔嵬朱旭吐朝燾蒼雲含暮臺漁歌月下起樵唱
雲中來睇隨時景換興逐登臨催緬懷避暑跡佇

立空徘徊玉殿騎荒草清蹕生塵埃豪華今何在
蒼莽有餘哀

山房梅花先發

春色仙金界瑤花映早陽月林融夜色風壑度寒
香冷淡同禪味孤貞壓眾芳一枝聊寄遠情為故
人長

宿治平寺

暝色投真境精廬一駐車暮山飛靄遍春嶺掛星
疎澤近窺汀火溪深宿夜漁良宵不成寐花月在

香除

江上別盛太學與明

草色汀方綠歸心鬢欲華楚江臨別路春水怨天
涯飛絮淒征舳青煙暗遠沙無勞歌折柳腸斷是
清笳

遊南山循嶺東行稍窮幽勝

隴首酬華矚寒山轉鬱蔥翳林難見日靈穴易生
風帆影滄洲外雞聲綠樹中何如石門與雲卧趣
堪同

冬日重過西莊

背郭雲莊淨孤邨雁蕩清岸迴沙半出山遠雪微
明草戶連郊色寒檐傍竹聲夜深靈籟作宿處本
香城

甲子除夕宿魚鄉館

旅跡原無定衰情此更加飄零逢歲夜惆悵宿君
家醺舉春生綠風飛雪度花故園今夕意悽斷若
天涯

秋日山中寄淳甫

客髮經秋短離情向暮深永懷辜馥意一展涉江
心嶺宿同哀狄林棲並倦禽白頭誰故舊感激為
君吟

春暮山中重寄張子

煙水途成阻雲天恨渺然素書緣病廢芳草為情
牽巖綠飛花後春寒細雨前聞君栖霞意遙贈蓼
莪篇

送淳甫重往白下

遲遲白下棹默默寒雲津怨別清江路相看暮髮

人客行偏冒霰家在不逢春長揖郵亭外含情柳
色新

山家

山家日翠微澹蕩挹清暉溪水繞門綠巖雲當戶
飛夕陽啼鳥盡細雨落花稀遲暮何知客逢歡便
作歸

題鄒氏山居

草戶煙波上林扉碧嶺西柳邊時繫艇花外忽聞
雞圍樹縈窗暗山雲度檻低主人開徑處惟有綠

桑蹊

幼于攜酌南館

避世南樓暇逢君遲客時綠陰消夏氣清壙貯涼
颼林密雲歸早溪深月到遲興闌杯未徹惆悵暝
煙滋

寓竹堂寺淳甫攜榼見過

境外歡良晤壺觴戀夕陰暝雲沉碧殿涼雨淡珠
林存歿悲前事榮枯愴暮心一樽仍自惜惆悵別
時襟

遊結草庵

指引松門路飄飄水上蹊
津雲春匝寺灌木晝藏
溪苔色終年綠藤花四月齊
歸途餘興緒黃鳥隔
林啼

遊報恩寺

繡眇重雲岫煙蘿故紉扉
畫梁雲氣盡網戶雨絲
飛僧寂鳴鐘罷林荒宿鳥歸
一燈仍自照惆悵戀
殘暉

春日登灣上水樓

心賞歡同調聊成暇日遊
暮窗紆翠岫春檻抱滄
流蕪綠煙催暝花寒雨作愁
紅芳坐來歇登處且
消憂

傷黃淳甫

在世同行客君歸莫怨先
夜臺多綺歲朝露少華
顛竹下今傷寂花前昔記眠
莫教隣笛奏懷舊易
潛然

花朝前一日對雪

仲月花晨逼飛霽點綠蘋紅芳
一夜變玉樹幾枝

新伏檻渾疑臘當杯半助春素華消處盡應避艷
陽辰

避暑東湖寺

物外尋真境雲標啓梵宮綠沉消夏氣紅艷奪春
工嶺色含朝旭巘聲亂夕空坐來林月上涼思滿
房櫳

哭白下沈山人鎮卿

分手渾如昨生離已十年何期從物化天外忽潛
然酒伴悽朝露花情憶夜絃無由伸掛劍拜手酹

蒼煙

歸次曲阿作

曲阿城外草萋萋匹馬東歸日正西亂後客身無
可寄春深鄉思轉成悽愁中燕子驚新社夢裡桃
花識舊蹊莫向行途歌不得青山茅屋任君棲

寓妙隱菴

東風仙苑闢芳菲家在雲林屢夢歸河畔草青鶯
欲語城南花滿蝶初飛寒生古院偏多雨苔沒空
階正掩扉留戀曲池春更好垂陽終日鎖煙扉

雲陽道中

雲陽郭外曉氤氳
 飛鞚連翩正逐羣
 天際楚山看易靄
 雲中江樹曙難分
 鄉心更值風花暮
 旅跡頻驚陌草薰
 欲向隴頭聊駐馬
 啼鶯深處不堪聞

送陸甥綬適淮陰

征帆渺渺去湖濱
 千里垂楊暗綠津
 乳燕不堪臨別酒
 落花偏自送離人
 淮陰尚說王孫市
 楚水空流故國春
 荒戍角聲愁暮起
 夕陽時節易沾巾

七十二峰足徵集卷十八

武峰吳定璋友篁菟錄

山陰沈步雲聲雷編訂

葉初春

初春字處元號吳西世居洞庭西山生秉穎資讀
 書過目成誦年十七補郡博士弟子嘉靖甲子以
 禮經中鄉試第二萬曆庚辰登進士授廣東順德
 縣知縣政尚寬平而馭吏嚴肅清田賑荒築城建
 閘葺學宮修邑志百廢具舉而民不勞計擒海寇

解散脅從奏績為天下第一戊子擢兵科給事中
辛卯陞戶科右典試江西簡拔多一時譽髦如碣
石舒公元撲唐公其尤也壬辰陞禮科左時李獻
可以建言豫教忤旨獲重譴公約同官張棟等上
疏申救奉旨切責公復疏力爭願與李獻可同賜
斥逐遂免歸越十年而儲位始定以冊立恩詔復
職天啟初卒追贈光祿寺少卿崇祀順德縣名宦
蘇府學鄉賢祠是為支嶺始遷吳門之祖

園居自述二十韻

廿年棲隱處不離小園中困厄胸無累經營術未
工掩扉三徑僻穿沼一灣通曲院塵區遠高臺色
界空數竿林竹翠幾種砌花紅爽映梧桐月香飄
菡萏風種桃嗟禹錫鑽李陋王戎屐齒倒迎客爐
烟熄喚童點甌茶更進觀奕局須終樽酒還堪繼
盤飧媿易窮少留閒話話莫遣去匆匆適興何妨
醉談時且似聾倚欄看去鳥側枕聽鳴蟲薙艸常
持鐻驅烏屢索弓按歌翻曲譜酬和托詩筒坐卧
隨吾意澆培課僕功跡疑輕冕紱心匪傲王公亦

自諳機變其如拂素衷漫誇身矍鑠且喜目玲瓏
却笑兒孫輩期予百歲翁

寒食蔡萬里邀過角里看花和韻

年年春日約看花佳水佳山好放槎萬樹忽驚三
月雪百川平落半天霞飄來香氣侵樽滿折得芳
枝插髻斜幾度寓游成勝事仙源誰向市城誇

角頭看花和譚滄洲韻

桃紅李白萬春花遊槩偏宜傍水涯艸色芳鮮初
過雨山光明媚盡鋪霞尋幽到處通香徑選勝頻

來醉物華天似更留人眺望却懸斜照漾平沙

辛亥夏日重登空翠閣

一去名山又隔年來尋僧話亦隨綠松蘿蔭合疑
無徑鐘磬聲傳別有天高閣拂雲空不礙層巒度
雨翠逾鮮登臨且莫嗟興廢萬古長流是檻泉

葉正春

正春字懋元

寒夜

朔風凜人聽燈影生靜觀微月落霜際怒濤鳴樹

端梅花香欲到楓葉色初乾漸入江天畫何妨此
夜寒

葉奕春

奕春字叔蘊

夏日閒居

池上卧殘暑鈎簾夕未昏
嘒蟬連北郭流水入西
軒曰愛竹林靜閒窺溪鳥
翻幽懷誰共語清切在
琴言

遊栖霞寺白鹿泉

秋尋入古寺松老植何年
微雨滑鳥道野花濛
泉採芹深澗底醉月亂峰
巔返步招提外疎鐘度
暝烟

葉逢春

逢春字華山

紹山咏壽友

地滿閒雲別有天披襟嘯咏紹前賢
探梅細闢盤
叢路采藥時同鶴馭旋萬頃波光浮樹杪半空嵐
翠落書編五湖酒載扁舟去一個峰頭醉一年

葉子循

子循字玉崙號湄仙初春曾孫以易經中順治丁亥進士初任北直唐縣知縣調繁浙江淳安縣再調陝西郃陽縣報最卓異丁外艱未赴京服闋補廣西容縣知縣遣吳中奏銷事起降秩歸田郃陽建祠祀之

都門別鄧元昭太史

飄蓬半載滯燕京不盡綈袍故友情秘院爾看成獨步郃陽我去住孤城牽衣楊柳垂溪綠照眼桃

花入酒明相對離愁神自黯那堪日暮聽倉鷓

送秦愷人民部出計鳳陽

一片明霞出建章江天雲樹曉蒼蒼黃綸初換楓宸近畫戟先傳梓里香鎖鑰淮南新憲府舳艫江上舊倉箱司農經國多匡濟自有鴻猷懋爽棠

洪洞郊行

纔出山陬向水涯酒帘飄處馬蹄斜參差遠黛明遲日宛轉垂虹帶暮霞麥隴乍侵芳徑州柳堤還繞杏園花依稀澤國江南景不覺間關道路賒

棘闈中對月

棘闈蟾魄影扶疎秋色平分此更多槐引素颺窺
碧幌桂團清露倚芳柯諸生借箸誇良策老子開
襟發浩歌記得五年前是夜也曾携卷望姮娥

呂西屏學憲以新詩見示依韵和之

博得新篇盡水南詩腸鼓吹借餘柑憑高屢引登
樓眺望古頻邀秉燭談雲錦並誇襄已七藜光遙
避舍應三奚囊正有驚人句斗酒酣吟未是貪

秋夜懷同門顧松交兼寄鹿城余石臣麗水

方邵村餘姚胥永公諸年丈

清光耿耿薄林臯中夜踟躕首自搔竹響似來元
歎駕月明欲泛剡溪舸天涯兄弟憐同調海內羊
求共短袍因憶姚江秋水發少微還傍釋山高

聞門人白蘂洲入中秘志喜

登瀛此日慰相思遙喜冰銜不自持授簡已看香
案裊賜蓮還望玉階遲千秋事業懸麟閣十載摩
娑到鳳池應信文章能報國莫教巨手負明時

天木弟秩滿應召兼祝誕日

奏績名書御座前吾家叔子正英年四郊已徧甘
棠咏三祝先陳協夢篇指日豸冠須報主此時鳧
鳥暫留仙與君式好遙相贈不比尋常祝華顛

葉灼棠

灼棠字函公號嵩巢東山紀革里人僑居棠邑為
江寧縣諸生由恩貢入成均順治辛卯中副車第
一癸巳以明經薦 廷對授內閣撰文中書生平
好奇計務遠畧時閩方拒命 上命定遠將軍討
之嵩巢得監軍與謀畫焉以平閩功超拜興泉兵

備副使詰姦防海息事寧人著有勞績後與巡方
者牴牾罷歸終于家有學古編志行艸燕山草存
餘稿平海吟庚辛涉筆等刻行世

述懷

大造本無極孰知開鴻濛扶輿喻靈氣孕化難為
功日星耀幽都燦然發群蒙精魂相蕩蝕兩間汨
興戎天道革其常人理信有終吾其叩冥漠萬古
將無同

川嶽萃正氣蔚為天地英大人得其真浩然無留

行道開天弗違運去莫能爭升沉自古然所慮毒
蒼生長松覆蔓艸冰霜非其情扶植葆元化至德
無能名

擬古

青青陵上茗莽莽澤中艸采蕪弄其英誰為合歡
好孤芳易搖落相示兩縈抱卓哉松柏姿歲寒長
自保物老乃多智人智忽已老欲向天門言含情
不能道

梧桐生高岡翳翳凌霄姿琢之成琴瑟絃以山桑

絲一彈別鵠操再鼓孤鸞詞悲歌發清商絃急誰
能治持此感人意好惡慎相置豈無巾車子不如
伯也懿

過鵞湖書院

尼山逝已久斯道誰復尋詩書絕微響琴瑟多遺
音狂秦既殄滅郭說仍見侵不絕如縷綫千載半
浮沉考亭大肆力講論皆規箴精義續微言窮理
衆所欽象山先主靜所得在一心淺者見異同大
道無戲欽嗟予聞道晚過此消胸襟瀟洒滿秋色

松竹正悲吟遺像儼如在故趾空泉林斯人雖已
往風流猶至今卓哉兩夫子海岳同高深

初入西莊田舍

西郊遘時雨麥華揚其香風疏宿莽新曉溜盈方
塘藉茅栖數椽獨樹成浮梁老農解揖讓童稚能
畊桑琴書清夜心莞篔生午涼雲山鬱多色艸木
罕不良百情自茲遠無為遲暮傷

野望

遐心在秋日啟戶對南山天光淡無影搖漾松風

聞却怪池邊鶴雲歸猶未還

喜雨

門外牛羊歸門中鷄犬眠上天念勞人霖雨盈中
田馭牛易力作耕者無息肩秔稻秀長陌豆葉亦
綿綿及此多歲功白首同晏然

懷田舍

刈麥迎天時麥成雨初足插秧滿町畦平野徧新
綠力田云有秋秔秣先後熟鷄犬有餘粒牛羊無
抵觸田父營所私村釀酬一斛陶然聊復醉盤飧

及童僕時或生微寒開牖引朝旭

鳥無巢

伐木為舟斧斤入山者數月肩運數百里疾駢而至噫烈哉作鳥無巢

木纍纍兮橫渠葉紛紛兮載塗鳥無巢兮向隅人
與獸錯趾無寧居借問執爨士道險今何如羊腸
千盤鳥路鬱紆人力苦微細鞭箠之下無賢愚嗚
呼焚林烈澤自古有驅除山靈何敢愛髮膚但願
大官馳尺書敢叩幕府緩斯須無使勞人草艸生
死不得少踟躇

河無船

水師乏舟提鎮拘集漁船以備防汛作河無船

河無船水多漁裸背肉膝波底居此邦以網罟代
耕鑿如農服田力穡亡耰鋤試問漁人何所慕潮
深汨汨隨鷗鷺龍窟宜藏瑪瑙盤蛟宮直矗珊瑚
樹何為乎入市潛行貫百錢侍兒更索江瑤柱

百雉高

長鯨吟浪颶風起二十餘城填海水祇有桐城捍
禦堅幾年又見生烽燧焚如萬縷當風前隍如挽
危石而置之千仞之山巔豈儒狃胸臆俗吏膠成
說曾不知百姓之顛連吁嗟乎士卒莫言勞大工

有時已觀察親來散役錢僕夫奔走與人喜與人
喜歌落成百雉高海波平

戰湄州

湄州嶼兩郡之衝積寇盤踞弄兵有年檄
水陸會師一鼓蕩滅民無擾焉

兵不在廣行列戰不在多殺傷請鳴專城將靜一
氣自揚馮陵在肘腋頗易別善良鐵騎啣枚中夜
發廝養奚兒禁無越舟師刻晷衝洪濤步卒星羅
待奔突洛陽橋邊塵不飛崇武山頭歌采薇轅門

獻俘揚國威橐筆論功師不歸君不見北風怒起
橫雕鶚傳諭虞人為掩骼

赤海圖

閩海上抵浙東下通東粵千有餘里總制
李大司馬新奉專制八閩之命蒙俯咨方
略具陳一二蓋不在形勢間也宜內撫百
姓以廣招徠命畫師繪圖以獻并系以歌
堂前突兀群峰出手捲蓬壺眇甌越兩瀨分流百
粵通寨遊今作長蛇窟赤子弄兵藩籬間波濤咫尺

尺迷神山島嶼鱗鱗限日月環帶溟渤西潺溪上
有迴風逆溯之彭湖下有衝流橫絕之臺灣東南
倚天險形勢何壯哉撫馭失其道蓄狸化為豺池
魚縱大壑鱗甲生塵埃我公直欲靖邊徼意氣橫
空山岳開拔劍一擊神鬼泣奔走下士如嬰孩天
風日夜驅海水一望滔滔亘千里眼底生民盡魚
鱉區區旣駘何為耳小臣總總無所知還有流民
之圖獻天子

邯鄲謁呂仙祠

高祠畫屋垂雲錦中有真人正鼾寢富貴神仙兩
得之何人不羨遊仙枕養生但茹肉石芝百歲還
同襁褓兒崑崙方壺不足憶痛飲大嚼真吾師盧
生盧生勸君醒叢臺蕭瑟霜風冷

贈凌元煥

海內幾人稱國手古淝周東侯中吳盛大酉余昔
游燕曾見之旌旗壁壘相先後近得毘陵最少年
奕也吾師飲吾友暫拂楸枰角彩珍錯落珠璣布
星斗忽爾大笑誇精筭勢欲飛鳴驚座右滿堂動

色嘆有神舉子安能勝其耦君才奕中仙來者應
推首小技寓深理慎毋矜勝負我欲致書廣陵童
子黃龍士還能鼓唇掉臂與君一戰否

牧馬韓道村和鄂學士韵

荒村初解轡戎幄暫為家步障深連席瓊瑜坐列
牙有田皆首着無處不琵琶遙憶江南路春風自
放花

大名遇雪

雪滿城西路征鞍已暫停旌旂虛夜月燈火散春

星擘甕村醪白堆盤野豆青更闌人迹少歸雁不
堪聽

師次彰德

韓陵一片石平野是中州極目空燕趙橫戈落斗
牛繁花依水碧孤月入雲秋車馬年年過龍山非
舊游

錢塘挽舟呈鄂學士

日出山城曉江散正北流遠峰如欲雨孤樹自成
秋牽我碧烏榜逐君青翰舟忽看旌颭處雲氣擁

龍蚪

種竹東莊

小圃新栽竹南枝高一尋及晨初受雨向夕已成
林葉葉瑯玕色絲絲造化心此君如有意清籟共
鳴琴

集拾翠閣

綠野春相問蘼蕪晚更妍花邊瀉瀉舞竹裏麝香
眠島色開三徑波光媚一天玉樓人盡醉歌管送
歸船

題嚴先生祠

遺臺高矗俯江濱萬里河山若比隣氣節獨先天
下士功名甘讓一時人餘風孺子留懸榻物色先
生折角巾天地寥寥幾人在烟波深處好垂綸

謝疊山先生書院

隨軍寓此

寂寂荒園無四鄰疊山遺跡起埃塵奇文昔自空
吳楚峻節今猶動鬼神畫角涼颼秋艸白牙旂落
日野烟新千秋恨在誰能識車馬紛紛鬧及旬

送汪西玉自粵西朝覲歸省

萬里星軺出上京便過鄉邑肯辭行宦情強半因
兒女旅食奚堪累友生衣帶曉寒濡水渡石田春
暖和雲耕客心已逐君歸去卧聽桑乾伐鼓聲

荆南春日

東湖新漲正潺湲旌旆飛揚擲甲山雲暗巫陽朝
暮色雪消巴蜀有無間園中蜂蝶時相見樓上笙
簫夜不聞約伴同沽沙市酒百花深處聽緡蠻
沉香井畔日將斜踏遍青郊白鼻騮社燕飛飛尋
故壘林鴉陣陣點平沙芳梅有韻吹寒笛朔雪無

殺入暮笳零落道傍官柳盡深春還發楚宮花

杏花蒲葉滿江天寒食東風在眼前楚女踏歌村

社鼓巴人爭挽拔河船鷓鴣聲裡飛朝雨楊柳陰

中宿暮烟喜逐流光看曆閏又添春月一回圓巳酉

曆閏十二月尋改
明年庚戌二月閏

有客依劉續古歡曲江詩賦共登壇驂騑舊識王

孫草鄧觀察
贈馬首蓓新霑學士盤秦太史
譙集錦水未消

三國恨綠楊猶送六朝寒天涯處處春風好此日

休嗟蜀道難

古梅庵詩

棠邑東郊有梅數株歲月不記已弗花矣
僧無垢結庵其側因名焉幹蒼以直枝勁
而不繁庚寅歲暮攜友來觀彌日不厭欣
然若有悟也無垢出所作古梅圖索咏援
筆為之

瓊林日日送春歸四照無燈白一扉卷幔宜看花
淡淡掛瓢空見影依依青山望去能偕隱粉蝶閒
來任獨飛相對莫教憎老醜些時多不解沾衣

無風無雨度良辰靜裡何曾負却春花葉不生俱
是淡形骸雖有總非真寂寥興若宜寒夜瀟洒情
同對古人忽憶昔年花落處朝來呼婢掃香塵
幽徑無人骨自芳獨留閒影照方塘隔林風急空
生籟滿地雲過不染香舞鶴漫隨湖上去飢烏時
向嶺頭颺遙思玉蕊清堪漱攜得高枝雪半囊

張果祠內兩老梅侍

雙髻憑闌喚玉奴逍遙携手上清都攀來天外三
花樹寫入人間五岳圖竹院霏微雲作縷柴門深

扁鶴相呼主人驢背吟殘雪一片寒山香有無

辭家

客子牽衣別老親教兒且莫厭風塵前途若寄平安字但說軍前活幾人

蕭蕭班馬去孤城花底鶯歌雜鳳笙把酒河橋輕語別誰憐萬里負戈行

葉壽棠

壽棠字介公嵩巢兄弟行也為六合縣諸生

兵燹後思歸洞庭和湯天邑

桃源元有路招隱許誰偕塵事到山盡浮名向酒埋抗懷雄九辨莊語雜齊諧便欲乘風去伊人水一涯

每懷無事事小築面湖濱椽寔山堪稅漁竿水不貧到窻梅是夢對月我為賓歸計今年決烟霞老此身

已作田間計猶為江上留最怜今夜月不異故山秋久客翻成戀言歸亦浪遊鹿門堪寄跡况復舊丹邱

可憐老瓦盆無酒暗消魂微雨寒生渚輕烟晚護
村人今思出世吾願返荒園自愧非陶令高風不
復存

葉芾棠

芾棠字懋公總角時即有才名冠其群從屢試不
售蒜髮種種始獲一薦明經卒年八十有九

為王抱綸題汪孝隱五種墨菊

昔聞柴桑翁秋英獨欣賞誦彼南山篇高風千古
上多今孝隱君出處何相仿傲骨凌霜枝寫照復

神王王子留真蹟人琴不俱往墨花向三載淡作
伊人想披之五色烟時出甯封掌

九月十三日家林屋豈僧叔過寓小飲賦得
冒雨尋菊同用微字

不爽東籬約坐淹窓雨微尊羹高士傳秋水野人
扉墨妙疑時眼詩亡屬布衣蒿萊從不剪謝屐莫
教違

葉令遐

令遐字士毅善談諧喜作汗漫遊同其姪王聞上

遊粵西三年不歸作詩一帙寄懷山中故人名曰
天際想竟没于客人多惜之

種桐

愛君能自潔栖止不凡禽幽響儲青巒輕暉揜素
衾風翻同上下月吐幾晴陰一片空明裡長存太
古心

過小孤山

波心青一點鏡裡弄竒姿殘篆封苔古高峰阻日
馳鳥歸帆影外龍出晚鐘時詩句隨潮冷蒼堦月

上遲

滕王閣次友人韻

去天尺五瞰長空闌檻新看創製工喜有高人重
啟晏豈無杰士遠乘風瞻雲不盡當年想倚馬誰
稱一代雄擊節共評秋水句歸鴻笑指落霞中
險倚江流勢逼空敢云人力勝天工雲歸南浦先
辭月雨挾西山欲御風遊倦自憐題句逸時垂猶
喜論文雄舉杯輒有登臨感半屬詩中半序中

粵中寄憶梅友

在野風流自不群
淳庵近稿遠方聞
八千里外常
愁我十二時中
只憶君榕桂
秋風悲落魄
池塘春
草夢殷勤
最懷明月鄉
園夜坐掩
衡門細論文

清明詞

嫩日和風淡淡雲
湖平山起望中分
年年路艸年
年在輸爾無情綠
到墳

邯鄲曲

世人皆是夢何處問黃梁
翻羨盧生枕逢仙得睡
方

葉經

經字有九居紀草里能為小詩

秋夜寄懷緯仲

夜色還如許情生自不同
月明秋共焰天碧水俱
空影對吟偏澁魂勞夢未通
飛鴻如可托遙寄一
殺中

葉鑣

鑣字維四

別僧房海棠

四月禪房領色香來從季夏到重陽
黯然對酒難為別始信元名喚斷腸

雪中

空得博今前數日未盡乘興故下詩
外子出時皆前生自不同良朋共飲
天學木身

七十二峰足徵集卷十九

寒園抄錄山遊山四面武峰吳定璋友篁菟錄

燕山甘天章翰仙編訂

李顯

顯字可大馬蹟西坵人明宣德三年貢生任浙江
處州府松陽縣知縣以子濬爵累贈湖廣布政使
司李

入春寒月

能作高明宰何妨歷此寒天空塵不到星拱位誰

七十二峯

馬蹟山

卷十九

千今古邀金鏡河山走玉盤
深宵霜皚皚宜與冷人看

李濬

濬字德深明成化己丑進士
歷任戶部主事工部郎中
河南參政湖廣布政使司
兩省多惠政祀名宦

寄答王學士守溪

家園彷彿小孤山四面烟波擁翠鬟
來往檣帆明鏡裡參差樓閣畫圖間
千年梅樹岩頭白二月桃

花洞口殷他日扁舟勞枉問柴扉
只在嶺西灣

李蘊

蘊字用之號行齋方伯從子明正德庚午舉人任
湖廣澧州學正補山東濱州學正陞河南汝寧府
確山縣知縣

錢節婦

內閣錢氏女年十六嫁同里姚冕生一女
成化十九年冕客死柩還迎哭舟次奮身
投水以殉所親力援出之服闋夫兄謀奪

其志氏覺遂投於池復救免家人防之甚密氏乃佯許之防少懈一日薄暮浙米釜中謂女曰汝蒸火吾少睡粥熟白吾比其女往白而氏已縊于床間矣時無爲表揚其事者旌獎之典缺焉故詩以弔之

猗彼錢淑人及笄歸姚氏貞性本天成卓然邁諸姊厥夫死客鄉時年尚少只聞訃哀慟絕歸櫬候河涘不獲睹生顏欲速見蒿里躄踊投清流所親援出水伯氏胡不仁奪志計卑鄙淑人懼不免從

容竟縊死嗟哉夫婦倫匪可輕易視一醮終不移喪節同犬豕寧忍偷餘生致遺君子恥淑人意何決不啻奇男子惜哉無旌揚幽光掩塵土我心爲惻然灑泪記終始匪直闡潛德因以正人紀閣筆倚山牕萬壑悲風起

題水平王廟

帝德傳耕稼王功佐濬川湖流三萬頃廟食百千年春港魚鰕美秋林果蔗鮮漫誇風土異努力種桑田

將歸夫椒泊湖口

咫尺胥臺路風波滿渡頭鶴情懸碧隴
尊思協滄洲遠樹迷歸嶼飛花引去舟
白雲爲帶處彷彿是丹邱

題祥符寺本宗上人畫壁

衆山飛翠入茅亭亭下孤舟鎮日橫
此境寂無塵事擾道心秋水一般清

李 翦

翦字潔之號浴川翦從弟嘉靖十三年選貢廷試

第一授廣東韶州府司李韶瀕海而俗悍健訟獄
多不結翦下車數月積案一清會海氛竊發當事
議用兵於水陸要衝舉翦攝參軍籌畫防禦悉中
機宜粵賴以安陞楚荊州通守職司捕務兩署府
篆盜息民安致仕後一刺不入公門然於興利除
害則言之侃侃不少避桑梓隱受其福沒之日唐
荆川先生輓詩云一朝天地收靈氣千古湖山失
主人

古劔篇贈何將軍

匣中芙蓉劍傳自風胡手紫氣森雲霓精光犯牛
 斗山空觸躩語夜靜蛟龍吼突兀虎豹關當今失
 所守攬搶犯天紀黃塵蔽九有贈爾英雄人策勲
 期不朽

還山

解組滄溟畔攜家紫翠間地臨雙港勝天與幾年
 閒茅屋靜聞雨竹籬疎見山墻東吟社在元白尚
 容攀

李備

備字嶺西方伯濬之孫為縣諸生忠信廉節古道
 照人有史某嘗寄白金二百兩人無知者史暴卒
 備召其子還之封識如故所著史學摘斷性理彙
 纂太湖志諸書皆失傳祀鄉賢

志感篇 馬蹟山化鯉騰蛟

混沌初闢有此山當年秦履曾躋攀七十二峯獻
 靈秀靈秀畢萃山之灣天生人物亦種種鯉化雙
 兮蛟出三禹門錦浪起平地東泉西嶺聲潺潺風
 雷頭角迥然異雲鱗兩甲真超凡兒童走卒莫驚

怪人文物瑞本相關君不見大叅方伯東西埒晴
峰行叟科名聯又不見邇來王氏已生翼宋君龍
化五雲間從茲矯奮寧乏人與君同賦志感篇

李 彛

彛號晴川行已方正有古遺民之風

夢回

夢回難未唱特問夜如何酒力寒能減詩懷老更
多不堪吾宇宙長任彼江河擬待東曦上登山一
放歌

竹下

夏到不知夏能生肺腑秋市朝多少地誰及此清

幽

燕來

歲歲誰招社自來春光剪破百花開獨憐鴻雁緣
何故每過江南只告哀

李高桂

高桂字太升孝友端方名高庠序鼎革後野服終
身其哭甲申殉義諸賢詩世猶傳之

惜別

一腔心事苦難留
書劍飄零更遠遊
夜未應知頻問夜
秋非底事忽悲秋
樽前漫說同樽好
地異方深各地憂
古渡青青一岍柳
也看行色幾回頭

李盛時

盛時字中孚號確庵
耿灣人讀書留心經濟為文章原本六經根極理要登崇禎庚午賢書嘗遊楚中同年友徐國瑞令醴陵確庵勸其積穀備賑未幾飢饉游蕪軍需孔亟大司馬楊嗣昌下儲粟令

郡邑皆束手無策醴陵獨以數萬斛如檄而至餉既充足而所活飢民無算國瑞得舉卓異第一確庵嘗自耕舍傍田數畝畝額租一石六斗而歲穫每不及其數惻然曰奈何以此病佃者遂每畝減租二斗通灣田千餘畝人皆援例減之貧佃以甦鬻革後削髮入山為僧裝郡邑數下徵書皆不應與杭魯詹談星

野馬塵埃年復年
柴桑栗里古陶潛
烟雲笑我無多地
星斗從他自一天
薄福怎消庚午後
浮生偷

得甲申前空門更占便宜法乞食隨時等醉眠

用中禪師

太平風景認前朝說向精藍萬慮消田可飯僧宜
自種社隨人赴不須招閒翻貝葉開蓮朶春到梅
花次柳條野艇久虛方外約新塘東去是夫椒
偶見友人扇頭西泠感舊之句因次其韻
西泠宛記昔年遊客夢重提到扇頭踏月三天山
寺夜觀潮八月海門秋肩輿迅步齊奔馬小艇
移慣狎鷗興到題詩粘壁處水天一色駱家樓

佛殿禮足五體投地不知此日是何日也

年年三月有今辰節換清和倍愴神恨事空門消
不盡心香一片蕤來真識田無種新生僕夢境多
迷得意人屈指數他方外叟北遊誰復記前因

李敬

敬字聖一號退庵東山人寄籍六合縣登順治丁
亥進士仕至刑部侍郎漁洋山人詩話云李侍郎
退庵與余及長洲汪茗文南海程周量論詩京邸
其說甚精余極愛其五言如酒醒亭午後人憶秣

陵西又瓜步新添水清明遠送行此例數十句皆
不減古人辛丑歸田舟過廣陵猶與余論詩移晷
未幾病卒病中自訂詩文若干卷刻之戒其子度
閣二十年後乃可印行今三十餘年矣余門人吳
曷編修其壻也屬索諸其子至再不可得今無有
知其姓字者矣余嘗錄二十餘篇於感舊集將來
或不盡湮沒者意在斯乎

遊盤石寺

撥雲尋古剎秋色正蕭蕭曲徑分山面飛泉出樹

腰門深紅葉雨碑斷赤烏朝僧老無拘束隨人過
石橋

清明雨泊瓜步二首

愁思如芳草春程不斷生停雲增野色過雨挾江
聲瓜步新添水清明遠送行從人作吳語歸計羨
朱櫻

春風搖岬柳江色上吳船雨雪初晴日鶯花欲暮
天近家餘別酒乞火趁新煙莫復愁途濶金山樹
影邊

山中晚歸

尋山竟日飽山容雲外穿雲更幾重秋色漸紅千
樹榭月光初白半林松前村出沒見漁火古寺迴
環隱暮鐘彷彿當年衡岳路驅車何意勝支筇

題烏石寺

朝駕巾車上碧山暮隨明月下山還回頭却望山
中寺半在寒煙古木間

石作屏風松作籬縱無煙雨到來逃山僧指點門
前路野鶴閒雲知不知

李珍

珍字子玉業攻木而不廢書卷能作小詩周王屋
云李馬郎詩當相之於牝牡驪黃之外者也

冬日雜咏

枯檜一株如海槎北風寥落集寒鴉樹頭怪石高
於屋光射殘陽似赤霞

雨過鳴泉穿檻出餅花日射凍蜂飛雞豚飽後自
呼舞山靜無人叩板扉

夏日雜咏

草長過眉不見人
閒花開落遞為塵
黑雲吹到前村雨
又入涼風快一巡

李仲芳

仲芳字  西山人

秋日集金峰寺

為覓禪栖處
窅然山數重
門通黃葉徑
人在白雲峰
晴雨花間瀑
寒霏石上松
東林凡信宿
殘月聽疎鐘

天王寺

行盡青松與白雲
空山寂歷少人羣
石門靜對雙崖啟
澗水寒從百道分
禪誦靈花空裡見
齋食清磬谷中聞
息機願借維摩室
時譯西方貝葉文

薛南

南字圖南馬蹟山人其父逐利魚鹽南少有志於學告其父曰兒將爲彼不爲此矣父遂聽其業儒窮究於天人性命之微發爲文章卓然大家風範同邑朱信夫毛式之唐希古唐鶴徵器重之令子弟皆負笈相從南生平以孝事親以友待弟以正誼明道教人卒崇祀鄉賢

聞雞

澤畔行吟老此生宵宵欹枕候天明聞雞忽作劉

琨想又聽哀鴻叫月行

薛直

直字司直圖南胞弟潛心理學文行不愧乃兄庠
序中稱為二薛先生

題竹塢

何年此地種瑯玕滿塢清陰六月寒記得相過烟
雨裡迷濛一箇綠雲團

萬頃春雲接地陰鄴侯書屋最深沉年年風雨看
龍化須識前人種竹心

馮景

景字永嘉馬蹟山人縣諸生好學問通經術正統
元年拔貢選授河南陽武縣知縣治行有聲擢湖
廣常德府司理慈祥治獄每有矜疑竭力與上官
爭執多所全活著素位堂詩一卷

蕭梁橋懷古

莫向蕭家問故宮瓊樓玉宇已成空祇今惟有橋
邊柳猶帶栖鴉拂晚風

馮世祿

世祿字廷伯號介軒永嘉之子居心長厚品望端
凝成化中以鄉貢任松江府學教授

贈李使君

雙旌五馬出神州南國分符擁上游陽羨雲深千
嶺合梁溪水順五湖流哀鴻此日勞新政破柱當
年識壯猷料得公餘饒逸興每攜賓從醉高樓

馮思正

思正字端揆家多藏書誦讀不倦折節下交無富
人子習氣弘治中以歲貢選授安慶府桐城縣學

教諭

偶過友人館中即景成詩

密葉陰成幄鶯吭滑欲流野花紅半畝細麥綠盈
疇斜日明漁網輕煙出寺樓戴顓茅屋外斗酒約
重遊

但見

拜
盈盈二八女款款來金界未審欲何求但見溪溪

入城不及宿雪堰橋

回首柴門日影消白雲如絮累山腰如何此去非
千里也學唐人宿灞橋

馮儒

儒字伯鴻少不好弄惟嗜遊覽嘗曰我輩幸生山
水間而不能領畧山水之趣是徒爲山水所笑也

五十述懷六首

閱歷今經五十秋浮萍身世敢隨流久知平子愁
難破幾度班生筆欲投車轍豈堪螳臂任文章還
媿豹皮留一從方寸爲形役不及忘機海上鷗

功業曾羞並狗屠支離切莫問榮枯閒看富貴花
開落不啻妻孥飯有無鷗鷺直教隨我狎馬牛從
此任人呼頭童齒豁將安往老我高陽舊酒徒
不到無錐不算貧緜袍也過幾冬春倘存蹙蹙三
分態豈是堂堂七尺身裘敝黑貂無鬼笑毛生名
刺任吾真相如縱奮題橋志狗監于今未有人
屈指光陰逐逝波少年心事漸消磨貧因徹骨難
賒酒書未臨池不換鷺水耨火畊綠已薄飢驅寒
逼病偏多休嗟負郭田何有催吏頻年喜不過

往日爭誇席上珍比來羞說老頭巾敲門也有催
詩客問字曾無載酒人自許胸襟差近古那堪時
事漸翻新可憐碌碌風塵輩飯熟黃粱夢未真
慚媿空爲盛世氓枝同鼯鼠竟何成閒愁縱向書
中散白髮爭從鏡裡生壯歲未諳辛苦味中年方
識嶮巖情醉鄉若許頻來往滄海桑田任變更

馮霖

霖字潤蒼讀書慕義友生有緩急傾囊以紓其難
事後無德色食餼有年同庠推其文行可以模楷

後輩

雨後東村觀菊

金英籬畔是誰栽九日霜前次第開試問賓王吟
賞後知音曾有幾人來

馮兆占

兆占字子豫潤蒼長子縣諸生

紅葉

腐草經霜盡可刪楓林點染血斑斑夕陽在樹不
知夜野水流紅到幾灣桃葉凋零空自怨柳條黃

瘦太無顏停車亦有人來看吾谷何如此一山

馮兆暘

兆暘字子晉潤蒼幼子縣諸生

西湖

共道西湖好千峯拱寺門谷深遲月影石瘦接雲
根鬼斧真成幻秦鞭未足論何時復來此相對坐
清尊

殷 鈇

鈇字良器馬蹟牛塘灣人明天順二年貢生任北
直涑水縣知縣

春霽偕友登葦渡庵小樓

樓空更喜值晴空水色山光一望中何事閉門虛
歲月儘堪隨處領春風斷橋古渡柳爭綠野店荒
村桃自紅得暇政宜同適趣春光那待白頭翁

管默思
 默思字咸和又字睿五馬蹟雁門灣人秉性剛正
 治家嚴肅有浦門鄭氏之風鼎革後閉戶著述不
 求聞達吟咏甚富然多傷時語故不盡傳
 行臥吟
 何處堪吾與空孤一片心滄桑恒寄慨山水孰知
 音躑躅雲廬隔蹉跎霜鬢侵所欣江管在行臥得
 酣吟
 聞鐘聲

夢回殘月在伴我碧欄杆天步今難問山家自足
歡烟霞供嘯傲觴咏得盤桓試聽晨鐘發邯鄲總
渺漫

無端

無端毛穎子天不禁窮搜以此爲吾友相從到白
頭漫將花月興寫盡古今愁誰謂遊囊澁叅之李
賀浮

魏惇徵

惇徵字培遠號西川馬蹟雁門灣人年少能文博
覽羣書食餼二十載七試棘闈不售著有四書講
義四書備考詩經講義訓迪後進門下多成名之
士

山居

牙籤萬軸屋三間不是幽人不往還雪裡醉歸迷
舊路月中孤坐對溪山梅欣遶舍常防折竹愛當
窻不忍刪有意避人思洗耳枕邊時聽水潺湲

魏綸標

綸標字玉燦惇徵長子

田家

清晨荷鋤出蓬戶忙向東臯一
迴顧草盛苗稀恐
失秋及時耘耔焉敢誤田家作
事實艱辛絲穀年
年預賣新輸足官租無督責飢
寒猶是太平民

遊點山石瀨灘

遠放輕舟泛碧流却於石瀨作
勾留濤聲忽訝松
間出山翠翻從水面浮樵徑幽
深時見鹿漁歌歛

乃不驚鷗斜陽未盡登臨興秉
燭清宵當晝遊

魏名大

名大字高封綸標長子

齋居偶作

甲子忙中過閒情靜裡長茶香
泉細品稻熟飯新
嘗覓句酬風月添衣禦雪霜禁
奢貧亦足忍辱又

何妨

魏余棟

余棟字其蕃綸標少子縣諸生

七十二峯

馬蹟山

卷十九

樂歲歌

農人苦力耕志在獲車籌水旱每不均往往空
嗚天心獨仁愛今年幸有秋盛夏風雨時八月禾
黍稠高下已稔熟與翼盈西疇轉瞬築塲畢擔荷
各自由富者積如茨貧者亦如邱婦子樂陶陶父
老嬉以遊禮義生富足盜賊從此休人心磐石固
國勢如金甌持此報明主請紓宵旰憂

秋晚

暑隨朝露散涼逐曉風生
啓戶清光滿開簾爽氣

迎漸疎蕉扇影暗促剪刀聲
喚醒幽人夢茅簷蟋蟀鳴

春遊

曲徑小橋通行行路不窮一堤楊柳綠幾處杏花
紅野鳥聚還散閒雲西復東登高憑極目山色遠
迷濛

立秋日早起

暑氣潛消半夜風庭階片葉落梧桐輕雲不掩銀
河影殘月猶明一畝宮瀨氣無端悲宋玉淒蟲何

意感歐公年年此際多愁集千古傷心豈異同

七十二峰足徵集卷二十

武峰吳定璋友篁蒐錄

嵩峰葉達耘渠編訂

鄒倫

倫字子序號太湖漁父東山嵩下人王少溪友也

太史雨夕燈下觀菊因懷九湖谷虛兩峰諸舅

晚菊冬逾艷虛堂夜更幽影隨紅燭轉香傍碧闌

浮雨阻花前轍雲連樹杪樓衝泥知共怯咫尺阻

同遊

鄒之翰

之翰字憲夫武山瓦塢人歲貢生與陳眉公米仲詔葛震甫相友善所著有梧月軒集海寧查聲山太史序略曰乙酉春

翠華南幸一時能文之士爭獻賦頌

天子命于行在考試拔若干人徵至京師開館選宋金元明四朝詩而鄒子念尊與焉鄒子世居洞庭其先世曰憲夫先生之翰曰舜五先生斯盛皆以詩有名于時然皆高隱岩阿詩雖工世未之見也幸

沐

寵靈撰次編纂因得褒揚其先世之幽美使山林野老之音俄而與帝王卿相賡歌廊廟之作斐然共垂千古噫豈非希世之盛烈也哉

虎邱訪王百穀不遇

有約扣松關新詩與共刪開殘荒市菊踏遍柳花灣石上人無跡沙邊鶴未還往來何所見明月在空山

過機雲讀書臺

捨棹隨溪轉溪窮山忽開昔為讀書地今作演經

臺雪綠覆巘篠風香出寺梅一聲雲外鶴二陸或能來

過陳仲醇白石山

聽鶯偶到此非是問奇來一石當樵徑千花壓釣臺也知巖壑邃適值草廬開几榻明於水琅玕影倒栽

晚坐

村墟帶落日遠見前林山登木鷄已下打魚人未還疎烟橫水際涼吹出籬間孤坐看新月清光遍

竹關

同陸世中孔介孺葛震甫集荷池

杯酒歡何極悠然對落暉荷風迎羽扇蘆葉隱鷗磯艷粉迴波舞歌珠傍酒飛相期待明月月上轉忘歸

登廣濟菴閣

古木攢茅屋雲深徑未開漁樵從不識我輩偶然來翠拂齊檐竹香吹隔水梅烹泉聲滿屋疑是雨相催

贈王百穀

懸水小橋山半路數峰遙帶草堂深簾花拂燕飛
清露庭樹閣雲添晝陰漁人沽酒澗邊出園客鬪
茶烟外吟有子負瓢孫荷杖紫芝黃鶴總無心

送周侍郎出按楚中

翩翩繡斧出青城把臂寧忘戴笠盟銜命自尊天
子狩埋輪重見使君行春風漢水雷霆動曉日湘
山雨雪晴狂客敢矜風雅在陳詩先作郢中聲

明發之贛州

離魂無賴怯輕寒促織如吟行路難岼柳翠團秋
未老江楓紅滴雨初乾冷風宿水三千里破膽驚
心十八灘不盡愁懷是今夕慰將白髮強為歡

月

雨止淨如拭月寒氣更清蘆花不生處樓閣水中

明

春暮泊吳山

扁舟泊處有漁磯為惜春光歷翠微花片亂飛飛
不去從風復上酒人衣

鄒斯盛

斯盛字舜五憲夫之子為縣諸生館于雲間得交董思白陳眉公兩先生嘗偕泛泖食蓴羹眉公語曰此陸士衡所云千里蓴羹種在雲間三泖者也後舜五泛太湖于苧藻中識蓴絲而采之以饋知味者於是湖中人始知有蓴葛震甫僧大香作詩以美之舜五築室于圃顏曰蓴冰舫以志喜并名其集眉公遊洞庭倩張君度宏圖為長卷徵海內名公題咏之時天啟二年壬戌秋也康熙乙酉春

駕幸江南舜五孫弘志獻詩賦采太湖之蓴以進并進

采蓴圖咏經

御覽發還為鄒氏世守之寶迄今采蓴之風盛于吳下

實自舜五啟之也其詩亦載四朝詩選中

澄心堂

南唐校讐所卜築在幽邃選文良亦難得士固非易一字足千古去取無二意如斯聖者心圓月中天對了了見萬里始慰構堂義

天闕山

梵宇何峩峩遙瞻若天闕古洞生冷香靈泉不冬
竭巖前庶獻花寶光中夜發燿影來閉門坤風扇
火窟檜老不知年根蟠六朝碣
寒食節登莫釐絕頂望縹緲峰弔陸纂甫
去年風雨節閉戶春江冷今年今日晴振策凌絕
頂野曠雲垂垂蕭條水西景悵望無一言殘陽下
高嶺

秋泛

漾舟南溪南葦荻生秋響葉落寺門前花垂蓼汀

上疎林見遠山殘日掛空網野水寒未枯照出鬢
眉爽

扁舟載西子

一朝已雪君王恥歌舞亦從今日止臣妾同舟幸
無死泛泛煙濤雪鷗起五湖幽事竟如此石室隔
花堪笑指

燕子磯

江上危磯高百尺孤亭下瞰鼉鼉宅一帶新莎秋
剪青浪翻千朵蓮華白飛颿如鳥沒雲痕野僧猶

踞臨流石

太平堤

太平門外蔣陵湖湖上猶存六朝樹芙蓉夾岍鬪
晴雲白鷺和煙立秋渚隔花有羨笑語香能使遊
鞭少延佇彷彿西湖飛絮天此中只少載歌船帝
京風物由來好不比臨安王業偏夕陽回首城西
路黃土墻低護紫煙

過陸清臣別業

水田剛數畝種菱蕪種藕一方新築水田中四牕

俱受藕花風古藤為杖竹為榻起看青山卧看月
田間晨夕不閉關酒人自來還自還

梅下懷陳眉公先生

空山千畝雪一白到湖濱鳥失曾棲樹寒欺不醉
人詎知今日夢愁及去年春猶向林中臥花明月
色新

答訥公梅下寄懷

林塘風雨盡獨飲對瓶花師在山南住書來水上
家其中語冰雪多半惜年華相憶無他贈封題穀

雨茶

舟中同無為懷疑父

纜解枯楊畔西風不少留
兩人同一被三日在孤
舟之子白門返故山
黃葉秋近聞弛酒禁
幾度醉溪頭

過劉玄雨園亭同諸子得登字

到日春將盡乘閒不待僧
園開香百畝城抱碧千
層種藕池翻土編籬架
引藤無風紅自落殘蒂
蝶還登

虎峰冬夜同疑父季昌無為惜別

夜靜石根坐酒清談昔年
曾開花裏社幾放雪中
船新月出茗水遠山浮
楚煙不堪千里去况乃
暮冬天

寒山踏月訪趙凡夫同曹平甫

小艇止山脚如無路可通
問僧知不遠有月興堪
同壁立寒雲下幢浮止
水中石關猶未掩燈影
出梧桐

泛泖

七十二峯

武山

卷二十

偶然乘興往不待棹歌催一壘破雲出孤花背岬
開石痕潮落遠烟際月飛來萬頃沉沉碧漁燈相
照回

太湖采蓴

春暖冰芽茁秋深味更精有花開水底是葉貼湖
平野客分雲種山厨帶露烹橘黃霜白後羸得晚
盤清

風靜綠生煙煙中蕩小船香絲縈手滑清供得秋
鮮荇葉分圓缺鱸魚相後先誰云是千里采采白

今年

雪夜同倪不瀉看月

為月立殘雪得君忘夜深光交清切骨影定寂歸
心萬井水初拭滿天寒不禁玉河堤上望彷彿在
梅林

過天竺山房

群峯迴古寺十里晝陰陰鑿石通花棧疏泉過竹
林客移殘日影僧定白雲心風外樵歌斷鳥啼煙
樹溪

晚泊雪上

古木欹橋畔根虛好繫船
半村斜帶日荒岬欲生
煙漁舍潛深柳牛衣遍野
田溪風寒入夜渡口一
燈懸

甘露亭尋蓮儒慧解二上人不值

短棹乘春渡幽尋雨後來
橋迴籬折入亭敞竹分
栽獨樹蹲雙鶴片雲陰
半臺二師清曉出日夕未
曾回

木末亭

逕轉林塘石列屏嵌中一突起孤亭層層萬木杖
下綠落落數峯江外青野鳥啼近酒人立閒雲飛
出秋空停前寺鐘催月未上城南燈火繁于星

芙蓉樓

王昌齡送別處

池開面面荻蘆秋四望湘簾倒碧流只種藕花忘
贈別若栽楊柳易生愁露飛一滴紅俱卸風透千
層香尚留日日離歌樓上起慣驚兒女不驚鷗

弘濟寺

江抱重關山截城鑿溪石磴放雲行觀潮閣險人

無影演法壇荒浪有聲默想當年曾捨筏固知今日尚留名門前空腹娑羅樹滿地離離秋自生

題滿字所寫風雨竹

伊誰不愛青琅玕城居得有何其難拂烟攬素空半壁潑墨無痕秋數竿忽向床頭聽蕭颯怪來風雨報平安香吹影落自無賴白日閉門高枕寒

碧螺峯

一峰突出煙中波遠遠望之青峩峩松陰滿天雲滿地石立如人衣女蘿

秋日眉公禎僊廬燈下看瓶中西府海棠用

壁間韻

更酌東籬秋已半海棠猶駐春風面蕤蕤絲搖葉葉鮮燈分影素杯分艷

鄒儒

儒字汝為號式與舜五之子少有志節能自刻勵中順治甲午浙江鄉試選嚴州府遂安縣教諭訓迪必以忠孝士皆化之康熙甲寅耿精忠反於閩賊黨馬鵬汪壽等旁掠郡邑入浙省陷遂安汝為

被執不屈授以偽劄不應乃幽之別室汝為伺賊
夜醉逸出攜其子弘志踰城至同年章潤奇家糾
集鄉勇信宿得三千人會于六星亭下選鋒六百
八十三人從章雙桂攻城雙桂先登斬其魁賊奔
逸城乃復翼日賊復掩至環攻甚力汝為多方拒
之凡十有七日鎮臣鮑虎救兵始至微汝為堅守
邑中幾無噍類矣其卒也遂安人祀之名宦祠生
平著作盡羅兵燹僅傳一二而已

徐同仁得子

驚鷲生生應期麒麟出出需時人發祥天無私器
允大胡嬾遲風始薰月初眉炎德熾離明熙孔釋
送來於斯卜啼聲辨英奇百祚昌一經遺欣再覩
徐卿兒

石蛇山

女媧餘煉石車氏闕聞星不知何代落化作青蛇
形形與天地相終始底定之前已如此夏后馴之
鎮西址我將以爾壽君子

寄輓沈雲上先生

一為蒼生再出山驅車嶺表鬢先斑縱教臥治天
恩重安得生全澤國還象郡月寒誰獨弔羊城雲
渺竟難攀從今寂寞吳江上故友門生淚自潛

鄒賓

賓字汝觀舜五之子周同齋詩稱其行曰精良如
古玉冷艷若秋花又稱其詩曰陶阮忻同德齊梁
媿小家蓋篤行好古之士也今求其稿不可得僅
於山祝集中獲詩一首
分賦漫山壽吳餘生

一氣互融結散為星海踪雙雙若崕嶠點入蛾眉
叢茅茨數十家呀鑿開鴻濛青青橫側立雞犬聲
相通置身蒼翠間宛在蓬瀛中茹芝竟為誰泠然
季子風

鄒弘志

弘志字毅仁一字念尊式輿之子性敏多智善談
論工詞翰少隨任遂安遇耿精忠之亂城陷後乃
父實有恢復功為武臣所攘弘志痛父忠之泯也
中心藏之二十餘年會康熙癸未

聖駕南巡弘志繪聖世効忠圖備載遂安被兵恢復情
形並繕聖朝首重忠貞臣父微忠未白一疏籲聞
得蒙召見乙酉

駕復南巡弘志獻紀恩詩進太湖之尊旋奉

旨考詩賦拔置一等在書館効力書成議叙授山西岳

陽縣知縣未幾以鄉試外簾失察降調江西寧州

州判卒于任

雨阻池河驛有感

風急投荒店淒涼費苦吟萬山連夜雨獨客五更

心嘹唳驚來雁漂零感暮砧有兒頻入夢不覺淚

沾襟

紅心驛道中

昨夜方愁雨今朝仍苦陰紅心山驛古黃葉馬蹄

深積潤浮空翠微霜點客襟牧童橫晚笛歸鳥和

清音

過蒙城縣

寒柳參差見溪流到處清勞人當遠道新月照寒

城不盡離鴻影偏逢落葉聲五更風色好便作馬

當行

月夜懷李約山嶧山昆仲

古道沉淪日交情君獨深忽逢明月照如見故人
心秋變庭前樹泉鳴石上琴秦關來雁少空谷感
知音

秋懷和沈孝干韻

旅牕寒菊暗飛香索句燈前每自傷絕不待人唯
歲月最難為客是風霜千秋業藉斯文在七尺天
容此日狂潦倒共傾今夕酒黃金何必問誰償

寄懷桐君少微兩姪

平于話別又經年却憶家山每悵然游子衣裳春
絮裏異鄉兄弟晚燈前幾回薄醉花千樹不斷名
香手一編好待秋來歸計決相期莫負舊林泉

渡涑水謁司馬溫公祠

在夏縣

疋馬衝風渡曉津中條屹立頌生申青苗得罷功
何偉旋轉乾坤只一人

貢尊詠

綠簑青笠雨濛濛萬頃煙波一櫂通為是春深櫻

筍外別饒風味在吳中
半畝浮家出五湖茫茫澤國浸菰蒲
凌波采得絲千縷好似冰心貯玉壺

慎在茲

在茲字念茲東山查灣人葉石君六憶詩序云在
茲慨華堂重閣之非分構亭以居顏曰自娛慨博
奕飲酒之非賢覓古錢以為好上自漢下至明按
年搜求其錢幾與泉志等每至風清日和獨坐亭
中攤錢盈几摩娑展玩呼妻孥以笑語真自娛者
也死後錢貽聳家余嘗歸而索觀焉因憶而弔之
又在茲性愛靈巖文石多蓄名磁盆盎養以新泉
作案頭清供所輯太湖詩選未成而沒予得其草

藁三十餘頁評點亦精求諸其家子孫已茫不知
 所謂訪其遺集亦無有存者僅于嬰鳴集中得詩
 三首而已
 中題蘇李泣別圖
 北風吹蕭騷陽鳥悲鳴飛萬里自此隔千秋杳難
 期徘徊河梁上白髮明斜暉一歸與一留漢家思
 終微
 江聲
 疏鑿歎神工洗汪莫可窮客懷深此際歲月盡其

中啣岸喧無定蕪潮勢益雄茫茫天塹險白日戰
 蛟虹

錢堆山

一卷亦擅五湖奇赤纍纍孰為遺當日漢文如
 識得也應賜與鄧家兒

慎康

康字子康

晚梅

處處梅花看盡發
 一樹獨蕭條久埋寒雪身

如石未吐春風口似椒芳信易傳南國近冰魂難
轉北江遙今朝纔見枝頭白笛裏誰家已亂飄

偶成

怪底傍人笑我痴秋來日日去尋詩一年好景無
多日紅葉枝頭半落時

費而廉

而廉字允修東山人

古意

黃沙沒馬蹄白草西風折男兒重封侯平野滿戰
血青青骨上苔猶伴鬪時鐵

桐花

秋日問桐花花謝子已結金風一夕吹葉葉聲蕭
瑟我願訴白帝且勿太狼藉牕前生意枯留取伴
明月

費世榮

世榮字彥仁

聽月

露坐明月中漏沉羣籟肅彷彿羽衣人獨按清商

曲

賣花聲

流艷隨聲過粉牆十分春色一絲長忙呼侍婢低
相喚可有同心與斷腸

七十二峰足徵集卷二十一

武峰吳定璋友篁菟錄

橘社金友理玉相編訂

葛佩

佩字鳴玉武山人震甫之祖少與吳太史與成同
學性恬澹不求仕進所居抱朴里枕鳳皇山麓舍
傍有片石峻嶒于灌莽間搜之剔之窪突盡顯登
陟俯仰湖山滿目名曰吟壇遶壇種梅百株掩映
如畫志將終老於其間因別號友梅風晨月夕邀

吳滄溟陸守畊輩觴咏盤桓有石壇吟咏梅花百
咏騷賦諸刻此震甫稱詩表治所由肇也

林隱

結屋南山隱地偏罕人跡庭空春寂寥花落草萋
碧飲濯澗中水坐卧松下石仙人有時來相邀了
殘奕

三竹歌

一竿兩竿竹聊以破吾俗渭川千畝多胸中若不
足賢哉主人皎如玉日日相看咏淇澳

春莫遲吳子不至

清晨掃堦除蘭露濕我裾老妻具鷄黍稚子摘園
蔬可人期不至好懷何以舒少焉見朗月皎皎顏
面如

落花

春園徂衆冶綠樹結籬陰泊水龍涎合縈苔鶴跡
深酒酣紅雨嘆恩斷白頭吟鑿爾榮衰相山公已
息心

萬卉各分散芳心誰久持顧茲衰謝日不改麗華

姿墮速驚攀樹飛遲欲戀枝尚餘香一點風外寄
游絲

雲

暮暮終朝合悠悠盡日間身經清漢表家在翠微
間出岫因風遠從龍帶雨還空山鐘磬寂相與卧
禪關

雁

北朔寒應早南翔得自優寧論邊塞遠豈曰稻梁
謀結陣雲迷浦哀鳴月滿樓玉門書未達惆悵幾

行秋

三月六日陸氏池亭作

三月鶯初至芳園艸徧青爰攜湖上客來醉竹間
亭花偃杯香濕魚翻水氣腥西山凝紫翠添我坐
中屏

泊瓜埠

移舟及瓜埠月上暮潮平宿鷺驚人語潛蛙聒水
鼓孤城江氣入六合樹雲橫勞爾關前吏頻來問
姓名

次東橋先生重九韻

重陽未到菊花開乘興還登戲馬臺山色暗將秋色去風聲遙帶雁聲來詩因客久頻添債酒為愁多不放盃湖海十年成底事星霜老病又相催

菊飲

霜飛九月菊開齊勝友相過酒自攜隣比種花同白首家常餉客有黃蘗百年天地今人物千古江山舊品題草草一尊期共賞詩情若在灤東西

送從軍入秦者

雨浥輕塵柳色新離歌三疊送離人牧羝蘇武終歸漢完璧相如不畏秦玉笛曉風函谷月葡萄香醞渭城春聖朝一統車書日道識長沮莫問津

留別沈歲寒

秋杪帆開甓社湖故人寫我送行圖望中白鳥雙飛遠天外青山一片孤幽債未償詩會散愁城欲破酒兵無行行忍見官塘柳情滿西風樹樹枯

聞吳子喬病

梁國歸來有贈金買山空卧洞庭陰五湖烟水棹

歌發九月霜籬杯影深丹木紫芝新藥餌白沙翠
竹舊江村相逢但勸加食飯莫更從前只苦吟

遊絲

碧空萬丈卷晴光散逐東風過草堂乳燕鳴鳩相
眷戀落花飛絮共悠揚江湖蕩子青春暮天地愁
人白髮長渺渺烟波看不見又隨帆影送斜陽

月梅

梅花明月兩婵娟花滿寒垞月滿天玉兔惜香和
藥搗靈娥憐影伴孤眠山中一片無瑕色絃上雙

清古調傳相對不知深夜冷儘教霜氣逼吟肩

畫梅

濡毫隨意寫花神冷蕊疎枝自逼真滿幅寒生剡
溪雪一枝香散硯池春相看月下非凡品忽到窓
前是美人寂寂山齋夜如許琴書無媿爾情親

葛符

符字芳洲友梅之子震甫父也稿都散逸震甫錄
乃祖梅花百咏卷末附載思梅詩一首

思梅詩

悠悠清夢飛羅浮香魂杳隔難追求想與林逋結
詩友定從姑射為仙遊青山一片孤月色白雲滿
目遮人愁春光歲歲自來去此心耿耿終無休

葛一龍

一龍字震甫友梅之孫有夙慧在襁褓聞乃祖吟
哦輒輒諦聽嘻笑若解意者搯觚時即思落落自
異書法亦古拙可喜補國子生肄業南雍金陵都
會地四方名士所萃處震甫一意交遊傾囊結客
年未強仕家已中落恒稱貸以供持贈西金吳凝

甫鼎者亦以詩鳴維時杜于皇顧與治結秦淮詩

社藉洞庭二甫為眉目其後詩日以工名日以高
而身日以困母夫人在堂幾不能供甘旨所親以

祿養勸乃鬻產入都謁選吳橋大司馬范質公景

時在銓曹識其名問曰若非吳下詩人葛震甫耶

曰然范笑曰其人美且慧是矣是矣選授雲南布

政司理問既至謁上官具袍笏踴躍作禮頌上官

皆目笑之然亦重其名委攝彌勒州事廉潔惠民

民歌之未幾罷歸而責券者填門接坐率無以應

惟書溟游諸詩遺之而已生平嗜詩若飲食若性命分夜侵曉冥心幽討務期自闢清新不肯一字拾人牙慧間與鍾譚酬答戲筆降格作楚調不免為錢虞山所訾然其心較本色自在也讀者當自得之

太湖石

陰精結玄冥鬼怪百千狀淪沒洪流間一出甲天壤好事疲民力椎鑿元氣喪所存悉神物鉤帶不相放驚霆宿幽隙仙雲接高曠昨游九月盡水落

石根剩觀止無吝竒更得陟其上古蘚深一尺垂藤十餘丈谿訝翳積土隱隱蓮花相何當盡洗剔高決湖心浪

雪夜懷沈子勺先生

雨止雪方受須臾没人脛夜半開門出抱甕汲冰井四顧何寂寥山空樹無影有懷將語誰破月上高嶺

湖上

幽侶過湖上持醪餉沙渚對面坐相悅綢繆以為

語垂楊團若蓋濃陰沃如雨隔浦掉頭人扁舟亦
來艤

石上

片石平楚間蒼潔復如流遊人十數葦布席不得
滿年年灑餘瀝繡作苔花暖偶坐便終日徘徊白
雲遠

湖中別聖僕

春湖一胡滿春蒲一胡短時鳥鳴嚶嚶新楊綠苑
苑日半帆陰直風柔浪花暖相對自生情將離復

誰縮雙艫忽向背行行入烟遠

送陳徵君歸四明

秋風戀徂暑吹動水烟熱與子結新歡孤懷耿將
別言從若耶去路指鏡湖月散髮蕩扁舟荷花櫓
前折

得潘昭度新蔡書答訊

故人宰一邑鳴琴事官守飛書致予問可繼床頭
酒予亦問使君曾似春風否春風苦不閒吹花復
吹柳

歲暮渡湖

出門不敢望一白數千頃杲日無暖氣霜鴻遞高
影椎冰取船路半渡却愁暝歲事復何如勞勞去
鄉井

予有林中草二百六篇失去三十餘年已無
可記憶一日子丘茂之伯仲購得金陵市上
質諸俞駕部謬以正聲見賞予聞而索觀有
若探環兒手中物也且向時酬對諸子存無
十二感慨係之因賦此以報伯仲并呈駕部

公

少小慕結撰往往付蕉鹿憐才有二子行市偶傍
矚故紙與陳言得似蛾眉贖持歸質吾友乃識初
面目夢人恍隔世交臂多鬼錄感嘆如見之再誦
以當哭春風吹秋殺空烟散江綠

睢陽雨

亂山忽不見萬馬橫空來金光爍其中冥晦時一
開四野濶無際觸髀向人語如何西北塵化作東
南雨

還山拜母

久客今來歸喜極涕交泣入門拜慈母白髮被手
面是兒身上衣結結臨行線是兒足下履業業春
冰踐頃篋既寡和竽瑟俱不善謬以魯縞矢亦備
東南箭升斗乃君食七箸幸親健毛義果何人茅
容有餘羨

出山拜母

暫歸如旅宿行止亦貿貿厥身吾母身於養未能
就斂涕飾好容再為膝下壽中婦前致詞吾門眷
天厚君無念晨夕婦能力左右黽勉登修途參前
屢行後晷影戀車隙山光浣衣垢一鮓未敢請三
橘審懷袖

望廬山

允矣廬山高山半懸倒景不遠舟中望恨莫見其
頂頂上至白雲平田數千頃瀑水飛欲出孤帆碇
秋冷

出疆

于役遵遠途前山集如蝟輿馬窮日力髭髮沐嵐

翠不知衣裾上沾濕父老淚既守河陽拙復濫阮
公醉何嘗造一福躬責多謬戾別當失怙悲捫心
轉生媿

疊水河

懸河天上落下復少平地梯棧百餘疊疊疊生烟
氣分瀾物溪壑驚霆抉陰翳紳垂碎雨襍簾卷飄
風曳中有綠水潭神犀躍露閃

飛雲巖

飛巖若雲構即以飛雲名偃撼夏峰亂氤氳春鬢

生大士宏願力獨立持將傾折枝洒清溜古藤垂
紫纓天地一開闢混沌為聰明蠻烟寇莽中豁然
移我情

洗研

片石有雲氣神髓盡皆墨寧澀千年繡不耐一日
積澄懷役無涯蕩滌臨不測蟄殼破玄卵游沫掩
烏賊苟非貞堅心失手蛟龍得所以硜硜者為能
守其黑

芟菊蕊

種菊一歲心何曾間朝暮及秋懼不蕊及蕊反多
故因繁而致簡用損以為護萌念近于忍觸手且
防悞細細向新旭累累帶清露自笑籬落入蕭閒
有餘課

懷澹如

山居五月盡涼冷如深秋况兼風雨散颯颯來高
樓樓高下無垠綠滿蘼蕪洲美人望不遠一水東
南流水流何時還相思日悠悠

然諾行

古人之交交以心一語不出然諾深今人之交交
以面然諾雖深中易變古人不可作今人難重陳
與君相見但飲酒酒盡俱為行路人

五浮

誰着烟空青五點狂瀾東下何曾轉奎躔歷歷應
浮沉河漢遙遙帶清淺山祇舊是匡廬翁幾年來
借馮夷宮落日中流棹歌起春風一片桃花紅

郭聖僕紅絲石研歌

漢武射蛟蛟不起蛟冰片片凝紅髓伊誰斧取作

君研拭手還愁化為水水霧重重浸月痕千年殘
墨繡雲根紅絲不斷繞三匝又若組織煩天孫君
藏寶硯幾盈櫝下巖青紫鞏昌綠一朝得此堪盡
廢赤帝發靈鬼神哭神物由來好事傳連城已享
中和年吾家仙令務高識中心好之不能得願擲
丹砂一百斛更乞青州二千石

觀倪盧牟所藏玉壚歌

地不愛寶崩崑雲璫璵委質商周君玄工刻意鬼
力竭大樸渾渾生至文千年會劫咸陽火九京復

殉長陵土百摺綢繆一線維萬全呵護群靈苦我
昨禦魑逃瘴來胡沙拭面眉目開見之大怪叫奇
絕世上鼎彝何有哉閔櫝重重纏古繡光汗津津
濕將透願致上清香案前為祝吾皇一萬八千壽

娑羅葉子歌

有引

盧牟好佛好古多藏三代鼎彝宋元名蹟
會必索觀以為眼食飽也今觀及娑羅葉
子不尤奇乎如影如繪蜘蛛綴蟬脫無風欲
飄吹氣可活又云優曇葉來自竺西博物

君子不能辨統非中土所有物以無為貴
購以一甕錢不多也

如水匣中秋片片縝膩而文如不見剪樣纔分七
襄織成陰曾覆孤眠殿又聞拈自瞿曇手寶相鉢
羅同植厚西來四萬八千里到日始為東土有東
有西來幾超劫澤腴剥盡無生滅相向何須影問
形飄飄風送空濛月

元變親家保和堂夜觀女劇賦

夜堂十月春烟膩明燈星布千花綴主人肅客客

唯我五色無妍八音廢艷陽飛動羅幃開娉婷忽
下襄王臺鳶肩公子綠雲鬟燕領將軍紅杏腮轉
眉轉盼皆光采一顰一笑千金買改粧改度鏡中
疑風氣風情林下鬢問名一一畏人知玉雪生香
明月姿鞭墮馬前楊柳翠袖翻枝上海棠垂海棠
楊柳俱無力放出新鶯啼不惜風吹弱縷嬌欲斷
雲引癡魂銷未得水流花送有情春已是橫塘避
逅人洗去殘脂羞面靨坐來軟語款頻頻飲予不
醉醉還飲歸去豈能眠得穩平原十日布衣交邯

鄴半夜盧生枕

靈巖山下尋黃二丈不遇

開戶見山如見君渡湖相問不相聞籬邊野水淡
秋色屋上老烏啼夕曛鄰人為說携家去更入青
山最深處溪寒路狹難獨行短棹空維烏柏樹

寇園再送日方同生子聖僕肇禧

祖筵開向阿誰家門掩春風幾樹花曲巷小園斜
影照鷓鴣飛出半窓紗徘徊轉竚幽房側天上人
間此相隔博山沈水裊輕烟烟霧中人予半識如

酣如夢復如迷竹肉和作新鶯啼使君陌上桑初
綠公子天涯草未萋酒後却嫌燭不滅目成無邨
人將別脉脉閒情片片愁秦淮流水盧溝月

夢蔡以寧

我夢尋君明月灣月波滉漾孤舟閒養成山中草
木性照見水中冰雪顏懽笑夷猶擷芳芷半語何
曾及生死龍枝欲動島烟生天海茫茫拂衣起

丹陽作

江流河流決如矢曲防新築巖巖起雲連粉堞兩

重城風嫋綠楊三十里小時行遠不知勞每向長
安過此橋衰髮還騎欵段馬春泥滑滑雨飄飄

細字詩贈鄧君彰甫

羲畫以前未有此羲畫以後此亦無閉目養明數
日始得見只覺秋毫易數春芒粗我有八角扇半
寫五岳滄洲圖願取一角為我書三都

姜儉伯園中古松歌

嘗于兩都看松樹靈谷報國俱見竒豈知去天一
萬二千里又見此樹叅天委地天矯而離褻蘚鱗

碧閃古錢大藤臂翠縛曼胡垂姜侯分茅裂斯土
數百年前先有之濤崩瀑闢已經多少晦冥作神
驚鬼怪亦費往來雷雨師園中硯礪不勝數當盡
斥去空藩籬獨留草亭一箇置其下嘯咏坐眠無
不宜君不見西川太史先生客滇久曾得品題為
淨友兩字蒼然大如斗我勸先生一杯酒

上元後五日夜晏楊念爾觀劇歌

眠柳風吹燒杏烟上燈燈火落燈然楊子宅深春
寂寂庾公樓殿月娟娟娟娟月轉流黃悞寂寂春

生七香路錯綺筵開卜夜長撒銀花迸流星度粲
粧呼出漏三加歌失新鶯鬢失鴉簾衣霧卷披紗
扇樹玉風清水照花奚但殼希影亦好遶帷書帶
皆香草坐上誰為萬里人鯨尊海吸狂瀾倒情以
文生文以情上元前後淡旬晴千山簇雉州如斗
一片仙霞照赤城

秋笛

苦竹叫雲碧楚天人正愁城頭半夜月城裡一家
秋氣肅陰相感殼飛火不流西風木葉下誰倚隔

江樓

聞有從軍四十年歸者感賦

劍立千峰外身當萬里行去時曾負氣歸日敢言
生家在侈天幸親埋懼土平年年戍婦哭曾見幾
崩城

澗上

白雲飛澗出林樾掛崩湍觸石互相嚙到湖經幾
盤五月與六月不襦亦不冠來聽一片響高枕松
風寒

潯溪對雨

市斷溪散遠橋迴野色荒吹來數點雨相送一孤
航漲綠平官渡烟黃拂女桑隔花僧共語東去是
錢塘

湖心亭

湖心青一點亭子出孤根柳吹蕩晴澱草烟生夕
昏人歸方見月舟聚即成村片席鷗光滿年年冷
醉魂

喜聖僕至

為約每無憑今宵喜得朋片雲波上宅殘雨夢中
燈春冷花如病齋清客當僧看山不待霽把臂入
烟層

送凝父之白下予將游武林

我向西陵去君先向秣陵草衣黏薄絮臺笠掛枯
藤野水花間渡香臺雨後登游人不到處一問六
朝僧

可惜

出門即是客况已渡湖遙可惜藤蘿月看人卧寂

寥水西龍渚石崦上虎山橋夢去渾無着秋聲集
夜條

寒夜泛秦淮

枯柳不垂烟蕭疎古渡邊寒生霜落水光動月明
船客夜獨乘興倡樓多醉眠衆散歸一寂空擲買
歌錢

贈德操

無日不懽然客來猶自眠會當修禊後詩在永和
前花氣濃薰酒山光冷壓船到門幽草遍一徑踏

春烟

過金德父墓

相送心曾到言尋路不迷草齊封鬣起山跌浪痕
低片石看人拜孤花柰鳥啼夜長誰慰藉應有鹿
門妻

徐日方水亭雨酌

結宇蕪烟際披紗柳浪間新鶯同客到微雨挈春
還呼取隔離酒看他何處山重來須蕩槳荷葉已
斑斑

寄雨公

以爾願初畢一瓢行脚寬那知出世法不及避人
難雲月千峰寺香花五戒壇微吟雖自好或得寄
余看

溪南夜泊

秋晦舟中夜相看獨有燈隨綠聊寄宿寧道不如
僧溪對橋雙影雲低水一層踈踈風柳外蟲響亂
漁湖

秋晚石湖作

豁然十數里一帆生雨西蘋花如欲語日暮不堪
携漁戶偏新郭僧田帶越溪依依為別處橋畔柳
陰低

雨夜舟中懷寔甫弟

風急雨聲亂颯來愁滿天不知飄泊處可有故鄉
船歸路關前夢殘更枕上年半生兄弟念多負看
山眠

新豐曉行

土屋暖堪睡主人燈在門爰循疲馬路漸入遠鷄

村山瘠乘霜氣溝深凍月痕隔疆兵燹地一邑幾
家存

徐州寇退喜會諸弟姪

弟姪客邊親生存亂後身寄書通不報覲面始為
真卧起燈三滅悲惟酒數巡故園同此念長至乃
明晨

倪不瀉至

門前忽下馬猶未信君來對面轉無語得書翻怕
開草芳初客遠月上獨行催母老應同我離腸日

幾迴

泊琵琶亭

亭子掛城角宛然流寓情秋風上絃急涼露濯衣
清異代孤舟夜空江九派散勞歌自相答不是少
年行

西湖

黛寫殘山帶郭遙鏡浮新水不通潮堤邊縹馬客
投寺花裡唱歌船過橋紅粉年年化香土春風處
處長蘭若湖心亭子湖心月醉與何人度此宵

至襄陽懷孟浩然

桺條青拂楚烟披
古道斜陽立馬時
淚墮已枯羊祜石
歌生誰問習家池
高懸日月三閭後
獨有先生五字詩
得意平生偏失意
鹿門偃蹇是吾師

觀瀑

怒劈青山走白虹
散為神雨復神風
半天忽有陰晴異
絕頂豈無江海通
冷氣巖林秋葉脫
濕光吹面凍花融
夕陽不倦枯藤倚
人在石橋空翠中

三月三十日

夕風朝雨送行塵
行未成行過一春
綠酒散為楊柳怨
紅顏銷得海棠嗔
匆匆馬首還車隙
歷歷山前更水濱
啼鳥數聲三疊唱
明年今日對何人

風夜宿塘橋

茫然山北水之東
忽露斜光下飲虹
燒燭坐堪銷夜酒
望家如隔妬津風
不禁是草傷心碧
何處無花薄命紅
憫默一春多半過
每當風雨在舟中

揚州夜泊即事

江空城夜冷高樓
有美鳴琴樓上頭
只此桺窻微

月照似他花澗暗泉流幽香彷彿因情寄遠聽其
如不見愁誰謂廣陵絃已絕巫山巫峽在孤舟

許茂勳烏桕閣

地幽霜肅氣珊珊小閣高臨樹樹斑東顧不遙寒
水渡西來俱是夕陽山連雲送客當秋杪片葉爭
題落酒間撤去四窓留半榻儘教栖鶻看人閒

送薛千仞歸隱甬東

候潮舟子立江干不雨江南五月寒風馬與君垂
老別烟波于我曰歸難西陵松栢高吟過東觀文

章小乘看歸處有山雲不淺莫容時宰問加餐

別葉鴈湖

別乃花時競渡邊又聞高柳咽寒蟬帆檣東指定
今日風雨橫來愁滿天出路何論一萬里還家不
道十三年臨行轉憶司徒餉幾續厨頭已斷烟

贈今度

紅藥親人綠滿鶯溪船溪女踏歌散還聞大捷收
全楚又敕諸璫返上京好事畚來成一會清歡今
日對先生林端小閣藏名酒巢飲看山紫翠迎

雪中看鴈懷施中行仝蔡以寧

朔風南下雪彌天朔雁南來客自憐
低送影散消挾纒亂無行次寫荒烟
兩家兄弟年殘裏萬里王程目斷邊
草草一緘那得寄海西烽火正同船

落花

已從游女踏初回難寫王孫日暮哀
有別儘教相送遠無聊如未見他開
酒埋香濕平原土歌罷風高泗長臺
秉燭也知情是累幾家猶費剪刀裁

寄趙凡夫十韻

用晦林初闢移家歲幾徂
劬烟安島嶼引瀑注江湖俯澗懷神駿
綠枝感孝烏一邱身自置文室坐堪跌
貝葉翻將遍蓮花種不枯石苔摹鳥篆
山菓入猿租偕隱寧忘漢連城已在吳
人間雙樹別谷口片雲孤湖水暮空澗
山嵐時有無所思勞倚望蕭颯起秋菰

過姚佩卿隱居

瀨淺維舟遠山紆引路徐相尋恐不見
相見喜何如積雪村村斷斜陽樹樹疎
門人共宿酒中饋炙

枯魚歲事將歸客
衰遲漸及予
松散動高閣
風葉亂殘書

送郭聖僕遊西洞庭

酒船西渡客
微醺碧雨初
收長澗紋到岸
拂衣先拜石
登峰投策易
乘雲林巖曲
度懷商皓洞壑
燈燒辨禹文
海日湧濤將
夜半嶺花填
雪過春分露
芽暖茁嘗新
薺水葉香生
摘短芹舍館
還尋勾漏宅
山靈解識武
夷君烟波渺
渺愁予望麋
鹿悠悠媿爾
群飛夢十年
今獨往幽深
窮得幾朝曛

題比玉霜林夜別圖

別意何蕭蕭
風吹明月冷
月照霜林中
低回一雙影

及滇

于役多負心
言從酉山過
不讀萬卷書
却行萬里路

哭從弟實甫

白下樓中別
東西一夜眠
詎知臨別淚
落盡是生前

別曲

具區橋下水悠悠具區橋邊郎發舟郎舟好載青山去免使蛾眉相對愁

野橋懷郭聖僕

白板斜飛曲岸通朱欄照見綠波中故人別處猶堪憶楊柳西邊蓮葉東

不然

不然今夜宿江村風雨敲中竟斷魂誰道解維還艤棹綠窓紅燭對花尊

東凡夫

石作藩籬樹結隣家生春茵與秋萼偶遺書法呼兒子未定詩篇詣孺人

題倪幼霞畫

却從何處訪清風一片雲山遠近中小路不平人不見夕陽疎樹草亭空

水次聞猿

急歸難與逆流爭一日郵籤五日行腸結泪枯無夢斷冷猿何必許多聲

八月二十三日沅陵道中

馬踏殘秋鳥路微憶孃今日罷縫衣孤臣涕淚孤
兒血風雨千山瀑布飛

八月十五盤龍寺

歷歷三年看月愁燕山楚水白門樓不知何處明
年夜更憶盤龍寺裡秋

京子題畫寄滿字


雨絲絲織養花天手劈吳綾當蜀牋數筆不成倪
處士與愁同上過江船

順林聞鴈

衡南南去萬山愁今到衡南又北轉夜半忽開啼
雪鴈兩年家信一殺秋

題畫寄與治

酒瓶傾盡不成詩日對秋風有所思只恐相逢過
重九為君聊寫未開枝



程